

Moderne Zeide

Omm letzde Freidaach habb isch beim Oikaafe in de Kolonnade dess Kättche getroffe.

Ei Kättche, habb isch gesaad, was dusde donn ferr zwaa volle Dutte schleppe. Iss de Schorsch nitt meddem Audo doo?

De Schorsch iss kronk, hotts Kättche ze Ontwort gewwe, der kann nitt eraus mett soim hohe Fiewer. No ja, ebbes misse merr joo esse unn doo bin isch halt omm Schleppe. Gugg, enn Haufe Gemies unn aach Hinkelssupp, also Hühnerbrühe, dass moin Monn bald widder gesund werred.

Doo hosde recht, Kättche saach isch, saach emm Schorsch gut Besserung, wanner gesund iss, soller mich emol oorufe.

Mach isch, seets Kättche unn wollt fortgieh.

Doo saach isch: Kättche, isch kann dich hoomfahn, doo brauchdsde doch nitt su vill ze schleppe.

Ach Honnes, seets Kättsche, doo deesde merr enn grüße Gefalle due.

Isch druff: Doo hinne iss moi Audo. Komm, isch nemm derr aach schunn emol die Dutte ab. Stell se uff de Boddem.

Hier hosde se, seets Kättche unn wollt merr die Dutte in die Händ gewwe.

Naa, stell se uff de Boddem unn donn nemm isch se, saach isch unn grins, waaßde, wenn du mir die Dutte in die Hond gewwe dust, due isch doi Finger beriehrn unn wenn jetz ooner grad mett soim Smartfon doodefoo e Foto mache dut, konnsde moie im Internet lese: De Honnes hott e fremd Fraa unsittlich ooge-griffe.

Dess Kättche hott mich oogeguggd als wenn isch se nimmi all uffem Kasse hatt unn seet: Iss dess doin Ernst?

Naa, saach isch unn nemm emm Kättche die Dutte aus de Händ, awwer was merr in dene moderne Zeide su alles in de Zeidung lese kann, donn kann su ebbes gons leicht falsch verstonne werrn. Donn duts haaße: De Schorsch ist kronk unn de Honnes will ebbes meddem Kättche.

Mir sinn donn uffs Audo zugonge, isch habbs uffgemacht, habb dem Kättche soi Dutte uff de Ricksitz gestellt unn woldere die Beifahrerdier uffmache, doo seets Kättche: Nein, mein Herr, ich bin eine emanzierte Frau, ich mache die Tür selbst auf.

Wie merr im Audo gewese sinn hawwe mir de erst emol laut gelacht, hawwe uns oogestumbd aus Freundschaft, die merr schunn seit iwwer sechzisch Jahr hawwe, awwer donn wollt isch doch noch ebbes frooche: Gnädige Frau Kättchen, sind Sie schon mal unsittlich berührt worden?

Seets Kättche unn guggt gons verschämt unner sich. Ja, mein Herr, vor zweiundsechzig Jahren.

Aha, saach isch, und? Haben Sie den Kerl angezeigt?

Naa, seets Kättche unn hott sich vor Lache uff die Lipp gebisse, isch habben geheirat!

Eiern Honnes